



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Tribunál Distritál Dili

1 April 2015

Tribunál Distritál Baucau hala'ó julgamentu no dilijensia liuhosi julgamentu movel iha Munisipiu Lautem

Iha 23 to'ó 27 Marsu 2015, Tribunál Distritál Baucau realiza julgamentu movel iha Munisipiu Lautem. Iha julgamentu ne'e, tribunál julga kazu 7 ne'ebé konstitui nu'udar krime ho natureza violénsia doméstika hosi total kazu 25 ne'ebé julga durante tribunál movel refere. Iha tempu hanesan, Ministériu Públiku mós halo dilijensia (investigasaun) ba kazu krime 19 ne'ebé akontese iha Munisipiu Lautem.

Aleinde kazu violénsia doméstika hirak ne'e, tribunál mós julga kazu krime seluk mak krime ofensa ba integridade fízika simples 7, krime ameasa 5, krime danu simples 3, krime furtu simples 1, krime ofensa ba integridade fízika neglijente 1 no krime kontra flora fauna 1.

Entre kazu violénsia doméstika 7 ne'e, kazu 5 mak tribunál konklui ona nia prosesu no kondena ho pena prizaun maibé ninia ezekusaun suspendidu, kazu 1 absolve hafoin altera ba ofensa ba integridade fízika neglijente, no kazu 1 sei iha prosesu nia laran. Iha parte seluk, kazu sira la'os ho natureza violensia domestika konklui oma prosesu balun ho klasifikasaun; kazu 1 kondena ho pena prizaun maibe suspende, kazu 2 kondena ho pena multa, kazu 8 omologa, kazu 5 adia no kazu 2 sei kontinua prosesu.

“JSMP fiar katak ho realidade aktual Timor-Leste ohin loron nian, tribunál movel nu'udar opsaun alternativu ida ne'ebé apropiadu liu atu hatan ba dezafiu sira ne'ebé comunidade sira iha área rural infrenta liu-liu limitasaun finansieru no distansia ne'ebé dook hosi tribunál sira,” dehan Diretór Ezekutivu JSMP, Luis de Oliveira Sampaio.

JSMP observa katak julgamentu movel ne'e diferente uitoan tanbá alende tribunál agenda kazu 25 hodi julga, iha tempu hanesan Ministériu Públiku mós halo dilijensia ba kazu krime hamutuk 19.

JSMP hanoin katak julgamentu movel ne'ebé realiza durante loron 5 ne'e, alende julga kazu sira ne'ebé tama ona iha agenda, mekanismu ne'e mós inderitamente intruduz ba comunidade sira oinsa sistema justisa formal nia funsionamentu. Hein katak ho prezensa regularmente tribunál

nian iha área rural hirak, bele sai nu'udar mekanismu prevensaun indireta iha comunidade tanba sira hare ho matan no sente rasik sistema justisa formal iha sira nia leet.

Julgamentu movel ne'e prezide husi juis Administradór Tribunál Distritál Baucau, Dr. Afonso Carmona, Dr. Hugo da Cruz Pui, Ministériu Públiku representa hosi Dr. Domingos Barreto no Dr. Alfonso Lopes, Defensória Públiku representa hosi Dr. Jonas Henrique da Costa, Dr. Juvinal Yanes Freitas no Dr. Jose Caetano Guterres (estajiáriu) no Dr. Antonio Fernandes (estajiáriu).

Atu hetan informasaun kompleitu bele kontaktu ba:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
Telefone:3323883 | 77295795